

# AKASHVANI(AIR)

RNU: KOLKATA

Bengali TextBulletin

29-03-2026

Time: 7.50 PM

## বিশেষ বিশেষ খবর -

১) প্রধানমন্ত্রী নরেন্দ্র মোদী মধ্যপ্রাচ্যে যুদ্ধ পরিস্থিতির প্রেক্ষিতে, ঐক্যবদ্ধ হয়ে কঠিন সময়ের মোকাবিলার জন্য দেশবাসীর প্রতি আহ্বান জানিয়েছেন। জ্বালানী সংকট নিয়ে গুজবে কান না দেওয়ার আবেদন।

আকাশবাণীতে আজ ১৩২-তম মন-কি-বাত অনুষ্ঠানে সুস্থ থাকার জন্য যোগাভ্যাসের ওপর গুরুত্ব দিয়েছেন তিনি।

২) রাজ্যে আসন্ন বিধানসভা নির্বাচনে প্রথম দফার জন্য আগামীকাল বিজ্ঞপ্তি জারির সঙ্গে সঙ্গেই শুরু হবে মনোনয়ন জমা দেওয়ার প্রক্রিয়া।

৩) নির্বাচন কমিশন, রাজ্যে বিডিও এবং এআরও মিলিয়ে মোট ৮৩ জন আধিকারিককে বদলি ও নতুন পদে নিয়োগ করেছে।

৪) আসন্ন বিধানসভা নির্বাচনের জন্য কংগ্রেস ২৮৪ টি আসনে এবং বামফ্রন্ট আরও সাতটি আসনে প্রার্থীর নাম ঘোষণা করেছে।

৫) অভিনেতা রাহুল অরুণোদয় বন্দ্যোপাধ্যায় প্রয়াত। তালসারির সমুদ্রে ডুবে জীবনাবসান।

৬) কলকাতা প্রিমিয়ার লিগ হকিতে মোহনবাগান ৪-১ গোলে ইস্টবেঙ্গল-কে হারিয়ে দিয়েছে।

আইপিএল ক্রিকেট প্রতিযোগিতার ম্যাচে আজ কলকাতা নাইট রাইডার্স, মুম্বই ইন্ডিয়ান্স-এর মুখোমুখি হয়েছে।

---

প্রধানমন্ত্রী নরেন্দ্র মোদী মধ্যপ্রাচ্যে যুদ্ধ পরিস্থিতির প্রেক্ষিতে, ঐক্যবদ্ধ হয়ে কঠিন সময়ের মোকাবিলার জন্য দেশবাসীর প্রতি আহ্বান জানিয়েছেন। আকাশবাণীতে আজ ১৩২-তম মন-কি-বাত অনুষ্ঠানে কোভিড পরিস্থিতির কথা মনে করিয়ে প্রধানমন্ত্রী দেশে জ্বালানীর জোগান নিয়ে কোনোরকম গুজবে কান না দেওয়ার পরামর্শ দেন। তিনি বলেন, এই বিষয়ে সর্বদা সরকারি তথ্যের ওপর নির্ভর করাই বাঞ্ছনীয়।

#### বাইট এশিয়া সংকট

আজকের মন কি বাতে শ্রী মোদী সুস্থ থাকার জন্য যোগাভ্যাসের গুরুত্বের কথা তুলে ধরেন। তিনি বলেন, আন্তর্জাতিক যোগ দিবসের আর একশো দিনও বাকি নেই। স্থূলতা ও অন্যান্য অসুখ থেকে বাঁচতে চিনি এবং ভোজ্য তেলের ব্যবহার কমানোর ওপর জোর দেন প্রধানমন্ত্রী।

#### বাইট ফিটনেস

জল সংরক্ষণের গুরুত্বের কথা পুনরায় উল্লেখ করে প্রধানমন্ত্রী বলেন, জল সংকটের মোকাবিলায় গ্রামাঞ্চলে সমষ্টিগত প্রয়াস শুরু হয়েছে। কোথাও পুরনো পুকুরের সংস্কার করা হচ্ছে, আবার কোথাও বর্ষার জল সংরক্ষণের চেষ্টাও চলছে।

#### বাইট জল সংরক্ষণ

প্রধানমন্ত্রী বলেন, সমাজের মানুষ ঐক্যবদ্ধ হলে ছোট প্রয়াসও বড় পরিবর্তনের ভিত্তি হয়ে ওঠে। এই প্রসঙ্গে তিনি উত্তরপ্রদেশের বারাণসীর কথা উল্লেখ করেন। এক ঘণ্টায় ২ লক্ষ ৫১ হাজারের বেশি গাছের চারা রোপণ করে গিনেস বুক অফ ওয়ার্ল্ড রেকর্ড অর্জন করেছে ঐ শহর। বিশ্ব জুড়ে জলবায়ু পরিবর্তন চ্যালেঞ্জের মোকাবিলায় এই ধরনের পদক্ষেপ প্রশংসনীয়।

---

কলকাতার মুরলী ধর সেন লেনে বিজেপির দলীয় কার্যালয়ে প্রধানমন্ত্রীর মন কি বাত অনুষ্ঠান শোনানোর ব্যবস্থা করা হয়। উপস্থিত ছিলেন কেন্দ্রীয় মন্ত্রী ভূপেন্দ্র যাদব।

কেন্দ্রীয় প্রতিমন্ত্রী সুকান্ত মজুমদার আজ উত্তর ২৪ পরগণার আগরপাড়ায় আসন্ন বিধানসভা নির্বাচনে পানিহাটি কেন্দ্রের বিজেপি প্রার্থী, অভয়ার মা রত্না দেবনাথ এবং দলীয় কর্মীদের সঙ্গে প্রধানমন্ত্রী নরেন্দ্র মোদীর মন কি বাত শোনে।

সল্টলেকে বিজেপির কার্যালয়ে দলীয় কর্মীদের সঙ্গে মন কি বাত শোনে দলের রাজ্য সভাপতি শমিক ভট্টাচার্য, মুখপাত্র দেবজিৎ সরকার প্রমুখ।

পূর্ব মেদিনীপুরের ভগবানপুরে মুগবেড়িয়া হাইস্কুল ময়দানে এই অনুষ্ঠানে যোগ দেন বিরোধী দলনেতা শুভেন্দু অধিকারী।

---

রাজ্যে আসন্ন বিধানসভা নির্বাচনে প্রথম দফার জন্য আগামীকাল বিজ্ঞপ্তি জারি হবে। এর সঙ্গেই শুরু হবে মনোনয়ন জমা দেওয়ার প্রক্রিয়া। ৬ ই এপ্রিল পর্যন্ত প্রার্থীপদ দাখিল করা যাবে। পরদিন জমা পড়া মনোনয়ন পত্রগুলি পরীক্ষা করে দেখা হবে। প্রার্থীপদ প্রত্যাহারের শেষ দিন ৯ ই এপ্রিল। প্রথম দফায় আগামী ২৩ শে এপ্রিল

১৫২ টি আসনে ভোট নেওয়া হবে। দ্বিতীয় দফায় ১৪২ টি আসনে নির্বাচন হবে ২৯ শে এপ্রিল। এই পর্বের জন্য বিজ্ঞপ্তি জারি হবে আগামী দোসরা এপ্রিল। ভোটগণনা চৌঠা মে।

বিধানসভা নির্বাচনের আগে রাজ্যে ব্লক ডেভেলপমেন্ট অফিসার (বিডিও) এবং সহকারি রিটার্নিং অফিসার (এআরও) মিলিয়ে মোট ৮৩ জন আধিকারিককে বদলি ও নতুন পদে নিয়োগ করেছে নির্বাচন কমিশন। মুখ্য নির্বাচনী আধিকারিকের দফতরের পাঠানো প্রস্তাবের ভিত্তিতেই এই সিদ্ধান্ত।

এর মধ্যে পূর্ব মেদিনীপুরে সবচেয়ে বেশি সংখ্যক ১৪ জন আধিকারিককে বদলি করা হয়েছে। এরপরই রয়েছে দক্ষিণ ২৪ পরগণা। এই জেলায় ১১ জনকে বদলি করা হয়েছে। এছাড়াও কোচবিহার, জলপাইগুড়ি, মালদহ, মুর্শিদাবাদ, উত্তর ২৪ পরগণা, হাওড়া, হুগলি, পুরুলিয়া, বীরভূম-সহ একাধিক জেলায় বিডিও এবং এআরও-কে বদলি করেছে নির্বাচন কমিশন।

কমিশন জানিয়েছে, প্রস্তাবে থাকা অধিকাংশ নামেই অনুমোদন দেওয়া হয়েছে, শুধুমাত্র বীরভূমের সিউড়ি এক নম্বর ব্লকের বিডিও-র ক্ষেত্রে ক্ষেত্রে এই প্রস্তাব অনুমোদন করা হয়নি।

আসন্ন বিধান সভা নির্বাচন অবাধ, সুষ্ঠু ও শান্তি পূর্ণ করতে রাজ্য জুড়ে ব্যাপক নজরদারি শুরু হয়েছে। ধারাবাহিকভাবে তল্লাশি চালিয়ে নগদ অর্থ, মদ, মাদক দ্রব্য, মূল্যবান ধাতু সহ অন্যান্য সামগ্রী উদ্ধারের কাজ চলছে। রাজ্যের মুখ্য নির্বাচনী

আধিকারিকের দেওয়া তথ্য অনুসারে ২৬ ফেব্রুয়ারি থেকে গতকাল পর্যন্ত বাজেয়াপ্ত হয়েছে মোট দুশো ৪২ কোটি ২৩ লক্ষ টাকার বেশি মূল্যের সামগ্রী। এর মধ্যে নগদ প্রায় ৫ কোটি টাকা, ৩৯ কোটি টাকার বেশি মদ এবং ৪৪ কোটি টাকার বেশি মাদক দ্রব্য রয়েছে। এছাড়া ১৫ মার্চ থেকে ২৫ মার্চ পর্যন্ত ১১৮ টি আগ্নেয়াস্ত্র এবং প্রায় ৬০০ টি বোমা উদ্ধার করা হয়েছে।

-----

নির্বাচনের দিনক্ষন এগিয়া আসার সঙ্গেই জমে উঠেছে প্রচারাভিযান। আজ বরিবার ছুটির দিন হওয়ায় তৃণমূল কংগ্রেস, বিজেপি, বামফ্রন্ট, কংগ্রেস সহ অন্য দলগুলির পক্ষ থেকে বিভিন্ন এলাকায় জোরদার প্রচার চলে।

তৃণমূল কংগ্রেস নেত্রী মুখ্যমন্ত্রী মমতা ব্যানার্জী আজ পুরুলিয়ার মানবাজার ও বাঁকুড়ার রায়পুরে দলীয় প্রার্থীদের সমর্থনে দুটি জনসভা করেন। মানবাজারের সভা থেকে মুখ্যমন্ত্রী তাঁর সরকারের বিরুদ্ধে বিজেপির পেশ করা চার্জশিট-এর সমালোচনা করে বলেন, এই ধরনের চার্জশিট দেওয়ার কোনো নৈতিক অধিকার তাদের নেই। নাম না করে প্রবীণ বিজেপি নেতা, কেন্দ্রীয় স্বরাষ্ট্র মন্ত্রী অমিত শাহ-র গতকালের বক্তব্যের সমালোচনা করে তিনি বলেন, বিভাজনের রাজনীতি করেই বিজেপি ক্ষমতায় এসেছে।

বাইট মমতা

এদিকে মুখ্যমন্ত্রী কেন্দ্রীয় স্বরাষ্ট্র মন্ত্রীর বিরুদ্ধে অসম্মানজনক শব্দ প্রয়োগ করেছেন বলে বিজেপির সাধারণ সম্পাদক লকেট চ্যাটার্জী অভিযোগ করেছেন। কলকাতায় এক সাংবাদিক বৈঠকে তিনি বলেন, তৃণমূল কংগ্রেস নেত্রী দেশের স্বরাষ্ট্র মন্ত্রীর পদকেও মর্যাদা দিচ্ছেন না।

বাইট লকেট

অন্যদিকে, বিরোধী দলনেতা শুভেন্দু অধিকারী কলকাতার ভবানীপুর কেন্দ্রে প্রচারে যোগ দেন।

---

বিরোধী দলনেতা শুভেন্দু অধিকারী নন্দীগ্রাম বিধানসভা কেন্দ্র থেকে আগামীকাল মনোনয়ন জমা দেবেন। কলকাতায় আজ এক সাংবাদিক বৈঠকে শ্রী অধিকারী জানান, হলদিয়ায় তিনি মনোনয়নপত্র জমা দেবেন।

---

অভিনেতা রাহুল অরুণদোয় বন্দ্যোপাধ্যায় প্রয়াত। পূর্ব মেদিনীপুরে একটি ধারাবাহিক-এর আউটডোর শুটিংয়ে গিয়ে সেখান থেকে তিনি তালসারী যান। সমুদ্রে তলিয়ে যাওয়ার পর তাঁকে দীঘা হাসপাতালে নিয়ে যাওয়া হলে, চিকিৎসকরা তাকে মৃত ঘোষণা করেন। মাত্র ৪২ বছর বয়সে রাহুলের এই অকাল মৃত্যুতে চলচ্চিত্র মহলে শোকের ছায়া নেমে এসেছে। “চিরদিনই তুমি যে আমার” খ্যাত রাহুল সিনেমার পাশাপাশি বিভিন্ন সিরিয়াল এবং ওয়েব সিরিজেও অভিনয় করেছেন তিনি। সম্প্রতি তার পডকাস্ট সহজ কথা জনপ্রিয়তা লাভ করে। রেখে গেলেন স্ত্রী প্রিয়াংকা সরকার এবং ছেলে সহজ-কে।

---

যুব ভারতী হকি স্টেডিয়ামে আজ কলকাতা প্রিমিয়ার লিগ হকিতে মোহনবাগান ৪-১ গোলে ইস্টবেঙ্গল-কে হারিয়ে দিয়েছে। মোহনবাগানের পক্ষে ববি সিং ধামি দুটি, মহম্মদ রাহিল ও শ্রেয়স ধুপে এবং ইস্টবেঙ্গলের সিমরনজোৎ সিং গোল করেছেন।

---

মুম্বইয়ের ওয়াংখেড়ে স্টেডিয়ামে আইপিএল ক্রিকেট প্রতিযোগিতার ম্যাচে কলকাতা নাইট রাইডার্স, মুম্বই ইন্ডিয়ান্স-এর মুখোমুখি হয়েছে। মুম্বই টসে জিতে কলকাতাকে ব্যাট করতে পাঠিয়েছে।

---

ঘূর্ণাবর্ত, নিম্নচাপ অক্ষরেখা এবং বঙ্গোপসাগর থেকে প্রচুর পরিমাণ জলীয় বাষ্প স্থলভাগে প্রবেশ করায় কয়েকটি জেলায় আজ হালকা বৃষ্টির সম্ভাবনা রয়েছে। উত্তরবঙ্গের দার্জিলিং, জলপাইগুড়ি, কোচবিহার, কালিম্পং এবং আলিপুরদুয়ার জেলায় এবং উত্তর ও দক্ষিণ ২৪ পরগনা এবং পূর্ব মেদিনীপুর জেলায় আজ বজ্র বিদ্যুৎ সহ হালকা বৃষ্টির সম্ভাবনা রয়েছে। আগামীকাল দক্ষিণবঙ্গের জেলাগুলিতে শুল্ক আবহাওয়া থাকার সম্ভাবনা। তবে মঙ্গলবার কলকাতা সহ দক্ষিণবঙ্গের কিছু জেলায় ঝড় বৃষ্টি হতে পারে বলে আলিপুর আবহাওয়া দপ্তর জানিয়েছে। আজ আলিপুরে সর্বনিম্ন তাপমাত্রা ছিল ২৫ দশমিক দুই ডিগ্রি সেলসিয়াস, স্বাভাবিকের থেকে সামান্য বেশি। সর্বোচ্চ তাপমাত্রা রেকর্ড করা হয়েছে ৩২ দশমিক দুই ডিগ্রি সেলসিয়াস, স্বাভাবিকের থেকে প্রায় আড়াই ডিগ্রি কম।

---